

Minister di Cultura Xiomara Maduro ta gradici y felicita pueblo di Aruba:

Nos talentonan local a briya durante manifestacion cultural Himno y Bandera

E pueblo a acudi masal pa festeha riba na Plaza Libertador G.F. Betico Croes



Diahuebs ultimo a tuma luga e Manifestacion Cultural Dia di Himno y Bandera riba Plaza Libertador G.F. Betico Croes. For di oranan di atardi e pueblo a cuminsa yega plaza caminda por a pasa na un total di 40 tent cu tabata tin benta di cuminda crioyo, cos dushi y artesanía mientras cu tabata tin entretenimento musical di Caha di Orgel y despues steelpan. Masha danki pa forma parti di e bunita anochi aki. Despues di yegada di e mandatario- local y di exterior, parlamentario- local y di exterior y demas invitadonan local y di exterior, maestro di ceremonia Melvin Garcia a yama tur invitado un bon bini na e Manifestacion Cultural Dia di Himno y Bandera 2022, e celebracion di 46 año di inauguración di Nos Himno y Bandera. E programa a inicia cu entrada di nos bandera door di nos deportista Sarah-Quita Offringa, 19 biaha campion mundial den windsurfing y a ser acompaña pa 15 atleta di Club di Gihae gymnastics Aruba, sigui pa nos himno nacional presenta pa Arubress. Masha danki na nos deportistanan y na e grupo di trompetistanan uni bao direccion di sr. Franklin Granadillo.

Pa Minister di Finansa y Cultura Sra. Xiomara Maduro, anfitriona di e evento, tabata un

honor y orguyo di por a dirigi palabra na tur esnan presente den cuadro di celebracion di nos Dia Nacional, Dia di nos Himno y Bandera.

E programa di anochi tabata yena cu diversidad den talento, musica, canto, baile, poesia y hopi mas. Un danki special na nos talentonan local cu a presenta y a haci nos Manifestacion Cultural Himno y Bandera un show espectacular. Gradicimento na gruponan di baile mini NTG y NLG, pa nan coreografia y creatividad di baile di nos hoben- y adultonan, Club di Movimiento pa nan presentacion di arte y baile clasico, Pierewietje y Flash pa nan baile folklórico.

Un danki ta bay tambe na e ganadonan absoluto di Festival Un Canto pa Aruba su Himno y Bandera, e duo Ruth Gaarie y Stephanie Gravenhorst cu nan cancion titula: "Ora bo wak na shelo", ganado categoria 13 pa 17 año Gismery Linarez cu a presenta su cancion: "Obra di Dios", ganado di 2do luga categoria 13 pa 17 año, e duo forma pa rumannan Daniella y Gabriella Boasman, cu a presenta e cancion "3 Palabra, Nos Bunita Aruba", pre-hubenil 10 - 12 año, Stephanie Quant ganado categoria 10 pa 12 año, cu e cancion un tumba "Bo mester sinti pa Aruba", ganado



2do luga categoria pre-hubenil 10-12 año, e hoben John-Maynard Wever cu a presenta su cancion un wals "Ta abo mi ta stima",

Aruba por a disfruta tambe di e presentacion di agrupacion musical Sabor Crioyo bao direccion di Jason Kelly cual a acompaña tambe J-vyön Besselink cu un tumba titula "Dilanti e ta bay, push'e",

despues cu un dushi danza titula "Mi amigo cododo" presenta

pa Jaymerson Kelly, 2do luga categoria 7 pa 9 año Festival un Canto pa Aruba su Himno y Bandera.

Palabra di danki ta bay tambe na dos hobennan Kiziah Trimon y Raynold Kelly cu e cancion "Color di speranza", otro impactante presentacion, e letranan di cancion adapta na Papiamento pa Sra. Maybelline Arends-Croes. E presentacion a ser acompaña pa grupo di atletanan cu movecion di señanan di man.

Continuacion pag 15

Continuacion di pag. 14



E programa di anochi tabata varia cu nos talentonan local y Joan Danies y Daylan Krozendijk a presenta un poesia ritmico den forma teatral. Un presentacion cu a capta hopi atencion y cu tabata algo diferente tabata e show di acrobacia di Daniela Sanchez y Hilyann Croes di Aerial Dance & Performance. Masha danki pa un tremendo presentacion.

Nos artista local Michelangelo Koolman acompaña pa un mini-banda a deleita e publico cu dos cancion di Aruba, e prome cancion tabata den e bos di Pearl Dumfries cu a presenta e cancion "Ta na Aruba", e segundo cancion tabata presenta pa Michelangelo Koolman cu e cancion "Aruba mi ta di bo so". Ambos cancion a ser acompaña pa e duo Marcie y Mirienne di Xanadu Dancers. Masha danki pa e bunita presentacion.

Mester menciona cu e presentacion di Edward van der Biezen y Jurick Salomon cu e tumba titula: "Mester por", a resona bon y a trece mas ambiente, cual presentacion a wordo acompaña pa grupo di baile Youth Kids in Action, masha danki tambe. E anochi a resalta e variedad di nos caracteristicanan den arte,

baile, musica y poesia, un danki di curason na cada un di nos artistanan y deportistanan local cu nan tremendo presentacion. Aruba tin talento cual nos tur ta orguyoso di cada uno. E anochi a sera den grandi den un fiesta total cu presentacion di Atanero & Friends, nos artista local cu ta celebrando 30 aña den e mundo di farandula, cu a duna un mini-concierto presentando diferente di su

temanan pegahoso di infancia te na grandi, kende a wordo acompaña pa The Popcorn Dancers y Carnaruba Costume Group. Masha danki pa clausura e evento aki den un ambiente formidabel. Ta momentonan inolvidabel di mira un plaza completamente yen, un anochi cu Aruba a briya y a celebra den grandi y yen di orguyo su Dia di Himno y Bandera. Masha danki Aruba pa bin hunto pa nos biba y stima nos cultura.

Por ultimo Minister di Cultura Xiomara Maduro ta gradici Comision Celebracion Dianan Nacional, Departamento di Cultura y tur patrocinadonan pa nan cooperacion pa haci e manifestacion cultural un fiesta di pueblo espectacular.

